

Powšitkowne WOZJEWJENJA

njedzelu, 6. septembra 2020

„Džak a próstwa“ – putnikowanje do Róžanta

Wěriwi ze serbskich wosadow su na swjedženju Marije naroda přichodnu wutoru, 8. septembra, na putnikowanje pod hesłom „Džak a próstwa“ do Róžanta přepróšeni. Předpisanych wotstawkow dla budu kemše na putniskej łuce. Wone započnu so hižo we 18.30 hodź. Procesiony z wosadow měli hnydom dale na łuku hić. Jeničce chorhojnicy, nošerjo swjatych křižow a družki póndu do cyrkwe, hdžež chorhoje, swjate křiže a postawy wotstaja. Družki začahnu k Božej mši z wołtarnej službu. Kopija postawy Róžeńčanskeje maćerje Božeje ma so na putniku łuku přenjesć. Wotpuskny paćer modla so wšitcy zhromadnje na spočatku Božeje mše. Rjadowanje wotchada po kemšach so na kóncu kemšow wozjewi. Na putnikowanju maja so předpisy korony dla, kotrež płaća w Sakskej, kaž tež wotpowědne postajenje Drježdžansko-Mišnjanskeho biskopstwa wobkedźbować, skedźbni dekan Wito Šćapan. Na tutym dnju budže tež dopołnja w 9.00 hodź. w Róžeńce Boža mša.

Wustajeńca wo česćowanju swjateho Bosćana

W Chróšćanskim Hórnikowym domje budže wustajeńca wo česćowanju swjateho Bosćana w Chróšćanskej wosadze po krótkej přestawce zaso wot njedzele, 13. septembra, hač do wutory, 29. septembra, přistupna. Potom změja zajimcy njedzelu po wšech kemšach kaž tež po nyšporje hač do 17 hodź. a wutoru wot 17 do 19 hodź. přiležnosť, sej ju wobhladać. Wustajeńca nasta w zamołwitosći Towarstwa Cyrila a Metoda z.t. zhromadnje z Chróšćanskej wosadu a tamnišim Bratstwom swjateho Bosćana składnostnje lětušeje 600. róčnicy załoženja tohole bratstwa.

Diakonska swjećizna w Kulowje a zběrka za potrěbnych w Pětrohrodze

Zhorjelski biskop Wolfgang Ipolt wudžěli sobotu, 12. septembra, na Božej mši w Kulowje Markusej Winzerej z tamnišeje wosady diakonsku swjećiznu. Kulowski farar dr. Wolfgang Křesák přepróšuje wšitkich, tutu Božu mšu, kotraž zahaji so w 9.30 hodź., sčěhować. Hladajo na koronowe předpisy so kemše do swjedženskeho stana z wobrazom a zwukom přenjesu. Zdobom wusyłaja so kemše jako livestream. Link k tomu je na Kulowskej wosadneje internetowej stronje www.st-mariae-himmelfahrt-wittichenau.de podaty.

Zběrka po kemšach budže k zdžerženju kuchnje za potrěbnych w ruskim Pětrohrodze postajena. Ju bě ze Zhorjelskeho biskopstwa pochodzacy prelat Hartmut Kania (1942–2001) lěta 1992 załožił. Koronoweje krizy dla je ta w swojej eksistenciji wohrožena. Inicijatiwna skupina w Kulowskej wosadze tule kuchnju hižo wot jeje spočatka podpěruje. Nuznje trjebaja tam 30.000 eurow, zo bychu tule kuchnju za potrěbnych w Pětrohrodze dale wudžeržować móhli.

Patronatne kemše Domu swjateje Ludmile

Wobydlerjo a přistajeni Domu swjateje Ludmile w Chróšćicach swjeća srjedu, 16. septembra, swój patronatny swjedžeń. Džakna Boža mša budže w 10 hodź. we wosadneje cyrkwi. Wšitcy wěriwi su wutrobnje přepróšeni.

Zjězd diecezanskeje młodžiny w „koronowej ediciji“:

Hromadže, na městnje, digitalnje

Dotal za sobotu, 12. septembra, w klasiskim formaće z 300 młodostnymi we Wechselburgskim klóštrje planowany zjězd diecezanskeje młodžiny změje koronoweje pandemie dla hinaši format. Změnjenych wobstejnosćow dla maja zamołwići nětko widejo-challenge, digitalne džěłarnički a kemše via livestream z Wechselburga předwidžane. Wšitke aktualne informacije k přizjewjenju, dokładny wobběh, wobdžělnski kit a widejo-challenge su na internetowej stronje młodžinskeho dušepastyrstwa wozjewjene. Link na nju je pod www.posol.de podaty.

Knižna premjera chroniki wo Worklecach

Ludowe nakładnistwo Domowina a Woklečanske Towarstwo kapałki Marije maćerje Božeje přeprašujetej na zhromadnu knižnu premjeru lětsa wušleje knihi „Worklecy něhdy a džensa – Räckelwitz einst und heute“, kotraž budže njedźelu, 13. septembra, hnydom dwójce we Worklečanskej sportowej hali. Přenje zarjadowanje zahaji so w 16.00 hodž., druhe we 18.30 hodž. Chronistaj Beno Wałda a Eckhard Kliemann, kotraž staj knihu spisałoj a zestajiloj, ju serbsce a němsce předstajitaj. Zastup a signowanje knihow je stajnje poł hodžiny do zahajenja. Hygieniskich předpisow dla je ličba wopytowarjow wobmjezowana. Tohodla měli so zajimcy hač do štwórtka, 10. septembra, we 18.00 hodž. přizjewić, a to telefonisce pod čisłom (0 35 91) 57 72 88 abo z mailku na buchhandlung@domowina-verlag.de.